



Publicaziuns dalla vischnaunca, jamna 26

Damonda da baghegiar

2023-1056.000

Datum dalla publicaziun: 30 da zercladur 2023

Patruna: Bergbahnen Disentis AG, Via Acletta 2, 7180 Disentis/Mustér
Representant: ipz ingenieure + planer ag, Via Lucmagn 7, 7180 Disentis/Mustér
Intenziun: Construcziun nova d'in sottetg
Parcella: 2932
Adressa: Via Caischavedra, 7180 Disentis/Mustér
Zona: – Zona per indrezs turistics
– Zona per il sport d'unviern
Zona da prighel: Neginia

Protestas:

Ilis plans da construcziun ein deponi tier l'administraziun communal. L'investa publica cuoza 20 dis dapi il datum dalla publicaziun. Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Uffeci da baghegiar Disentis/Mustér

Lubientschas da baghegiar

L'istanza da baghegiar ha concediu suandontas lubientschas da baghegiar:

Nr. 2022-1021.001

Christoph e Marianne Kohler-Desax, Laubenstrasse 8, 7000 Cuera; *midada da project*: construcziun nova d'ina casa da pliras famiglias cun garascha integrada, parcella 402, Via Buretsch 19, 7186 Segnas.

Nr. 2023-1029.000

SAC Sektion Winterthur, Am Eulachpark 25, 8404 Winterthur; sanaziun dalla camona SAC Cavardiras, spazzament parzial e construcziun nova d'in niev edifeci annex cun engrondaziun dalla surfatscha da habitar, sanaziun dil provediment d'aua e dil sistem da deflussiun, parcella 2948, Senda Camona da Cavardiras 8, 7180 Disentis/Mustér.

Nr. 2023-1030.000

Christian e Maria Gabriela Eberle, Zollikerstrasse 227, 8008 Zürich; sanaziun energetica dalla casa ed engrondaziun dalla surfatscha da habitar, Via Curtins 7, 7186 Segnas.

Nr. 2023-1039.000

Markus Maissen, Staldenstrasse 58, 3920 Zermatt; sanaziun e renovaziun dalla casa d'ina famiglia, midada da diever da stalla tier habitaziun, parcella 45, Via Salez 19, 7186 Segnas.

Nr. 2023-1040.000

Lorenz e Silvana Fuhrer-Arpagaus, Eggstrasse 34, 8907 Wettswil; sanaziun energetica dalla fatschada e dil tetg dalla casa da duas famiglias, parcella 569, Via Run 5, 7180 Disentis/Mustér.

Nr. 2023-1041.000

Patrik e Karin Trüb, Claridenstrasse 7, 8810 Horgen; sanaziun energetica digl edifeci nr. 246 ed engrondaziun dalla surfatscha da habitar entras in'annexa, replazzament dil scaldament entras ina pompa da calira d'aria, parcella 1386, Via Clavaniev 31, 7180 Disentis/Mustér.

Nr. 2023-1042.000

Durschei Fiduziaria SA, Via Lucmagn 7, 7180 Disentis/Mustér; sanaziun dil plaun tratetg e nova partiziun dallas surfatschas da habitar, parcella 631, Via Pervenda 5, 7180 Disentis/Mustér.



Nr. 2023-1048.000

Benediktinerabtei Kloster Disentis, Via Claustra 1, 7180 Disentis/Mustér; niev cundrez fotovoltaic el liber, parcella 580, Via Sogn Sigisbert, 7180 Disentis/Mustér.

Uffeci da baghegiar Disentis/Mustér

Annunzia da baghegiar

All'istanza da baghegiar ei sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziou il suandont project:

Nr. 2023-2031.000

Alois Levy, Via Faltscharidas 17A, 7180 Disentis/Mustér; remplazzament dallas storas ed ullivaziun dil terren, parcella 1715, Via Faltscharidas 17A, 7180 Disentis/Mustér.

Uffeci da baghegiar Disentis/Mustér

Cussegl da vischnaunca

Rapport dalla seduta dils 21 da zercladur 2023

Deliberau in credit per l'installaziun d'in indrez fotovoltaic alla serenera Raveras

Mesjamna, ils 21 da zercladur 2023 ha giu liug la 23avla seduta dil cussegl da vischnaunca dalla perioda d'uffeci 2021/2024. El center dalla seduta ei stau in credit pil project d'in indrez fotovoltaic alla serenera a Raveras ed il plan da finanzas pils proxims 10 onns. Il cussegl da vischnaunca ha concediu unanimamein il credit pigl indrez solar ell'altezia da frs. 136'000.--. Plinavon ha il parlament communal priu enconuschientscha dil plan da finanzas, il qual preveda ils proxims onns investiziuns el rom da strusch 20 milliuns francs. En quei connex ha la suprastonza communal era informau davart ina nova strategia da taglia.

Il cussegl da vischnaunca sut l'egida dalla **presidenta dil cussegl da vischnaunca Helga Probst-Linder** concediu pil project digl indrez fotovoltaic in credit da frs. 136'000. Cun la construcziun digl indrez fotovoltaic vegn l'atgna producziun d'energia electrica augmentada dad oz 20.7% sin 66.5%. Il project preveda ina prestaziun da 94.5 kwp ed ina producziun annuala da rodund 93'000 kwh. Il project duei vegnir realisau uonn.

Plinavon ha il cussegl da vischnaunca priu enconuschientscha dil plan da finanzas pils proxims 10 onns. Igl ei quintau d'investar ils proxims onns rodund 20 milliuns francs. Ils pli gronds projects ein actualmein la terminaziun dil Center Fontauna, la renovaziun ed engrondaziun dalla serenera Raveras, la sanaziun dalla Via Cons e la realisaziun dallas mesiras per augmentar l'attractivitat dil center dil vitg. Ulteriuramein ha la suprastonza communal presentau ina nova strategia da taglia. Quella preveda da reducir il pei da taglia entochen igl onn 2029 sin 98%. Per contonscher quella finamira duei vegnir sbassau il pei da taglia ils proxims sis onns annualmein per 2%. Grazia alla planisaziun da finanzas fetg minuziusa, detagliada e seriusa ei in svilup progressiv dalla vischnaunca cun far las investiziuns necessarias e cun la nova strategia da taglia pusseivla e responsabla.

Buca sco davos ha il cussegl da vischnaunca approbau la proposta dalla radunonza da delegai dalla CSSC da dissolver la Corporaziun schigentera solara da gliet Cadi.

Suprastonza communal



Inauguraziun dalla senda Cuolm da Vi – Stgeinas

Dumengia, ils 2 da fenadur 2023 vegn la senda nova Cuolm da Vi – Stgeinas surdada festivamein a siu intent. Il program da fiasta sepresenta suandontamein:

10.30

– partenza cun la cabina naven da Salins a Cuolm da Vi

11.00

– beinvegni e plaid festiv entras il president communal
– plaid dil president dil cussegl d'administraziun dallas pendicularas Mustér SA Marcus Weber
– aperitiv

11.30–14.00

– gentar cun risotto
– accumpignament musical

14.30

– viadi viers Caischavedra

Ca. 16.00

– descensiun cun la pendiculara viers Mustér

Cordialmein envidan

Vischnaunca da Mustér e Pendicularas Mustér SA

Center da rimnada a Raveras – Novas uras d'avertura

Naven dils 26 da zercladur 2023 ei il center da rimnada a Raveras aviarts sco suonda:

– **gliendisdis - venderdis dallas 12.00 entochen allas 17.00**
– **sonda dallas 8.00 entochen allas 11.00**

Gronds quantums da rufids blocconts ni rufids da baghegiar ein da dismetter alla deponia a Rueun ni sur ina fatschenta specialisada per quei intent. Nus supplichein da mintgamai purtar pigns quantums rufid bloccont a Raveras.

Dapi igl 1. da zercladur dat ei buca pli las muldas da rimnada da rufid bloccont e lenna. Tals rufids vegnan rimnai cun ina nova stadera e pressa. Tier quella stadera sa vegnir pagau cun carta dad EC, carta da credit e Postfinance. Il pagament via Twint ei pil mument deactivaus, ei vegn luvrau vid ina sligiazun.

Bien engraziament per Voss'enconuschientscha.

Uffeci d'infrastructura e baghegiar

Rapport da gestiun 2022

Il rapport da gestiun 2022 ell'usitada fuorma stampada e ligiada ei vegnius distribuius quest'jamna en tuttas casadas en vischnaunca. Ulteriurs exemplars san vegnir retratgs en casa communal ella stanza da publicaziuns (1. alzada).

Il rapport da gestiun culs detagls tiel quen ei era publicaus en fuorma digitala sin www.disentis.ch sut downloads – contabilitad.

Administraziun communal



Controlla da habitonts

Mortori

Helena Giger, naschida ils 8 d'october 1933, morta ils 22 da zercladur 2023

Administraziun communal

Biblioteca populara Disentis/Mustér e contuorn

Nus selegrein d'era astgar esser cheu per Vus duront las vacanzas da stad. **Naven da gliendisdis, ils 26-6-2023 entochen venderdis, ils 11-8-2023** ei nossa biblioteca mintgamai aviarta sco suonda: **gliendisdis e venderdis dallas 17.30 – 20.00.**

Naven da gliendisdis, ils 14-8-2023 (entschatta dalla scola) ei la biblioteca puspei aviarta 4 gadas per jamna. Nus giavischein a Vus bialas vacanzas e selegrein sin Vossa viseta.

Il team dalla biblioteca

Es freut uns, dass wir auch während der Sommerferien für Sie da sein dürfen. **Ab Montag, 26.6.2023 bis Freitag, 11.8.2023** ist unsere Bibliothek jeweils wie folgt geöffnet: **Montag und Freitag von 17.30 – 20.00 Uhr.**

Ab Montag, 14.8. 2023 (Schulbeginn) gelten wieder unsere üblichen Öffnungszeiten.

Wir wünschen Ihnen schöne Ferien und freuen uns auf Ihren Besuch.

Das Bibliotheksteam

Center Fontauna

Reservaziun nova sala el Center Fontauna

La stanza da polisport e seminars nova el Center Fontauna sut la halla da tennis sa vegnir nezegiada naven dil fenadur 2023. La stanza ei adattada per sports da sanadad (p. ex. joga, pilates, fitness da gruppa etc.), per sault ni era per sesidas, seminars etc. Ils prezis e las cundiziuns da reservaziun ein publicadas sin la pagina d'internet <http://www.centerfontauna.ch/reservaziun>. Las reservaziuns annualas pigl onn 2023/2024 prendein nus bugen encunter **entochen ils 9 da fenadur 2023** per e-mail sin info@centerfontauna.ch.
